

# 3 Keuninge brunch 2013



6 januari, 3 Keuninge- brunch in Zalzershaof

De **3 wieze Keuninge** oet 't oëste Caspar, Melchior en Balthasar volgde de ster die eur naor Bethlehem leidde. Zoeë steit in de Biebel. 't Is bekind det ze vuuel verstand hadde van sterre en de

toekóms kóste veurspelle.

Maar dees reis hadde ze baeter 'ne tom-tom met kinne neme want Holt Blieërick leet toch 'n stökske oet de richting.

Beej Zalzershaof hong waal 'n ster baove de zaalingangk maar of se die in 't oëste al kóste zeen.....?

't Veel op det ze in Zalzershaof maar met z'n tweeë ware, zelfs de kemiel hadde ze thoes gelaote.

Det is netuurlik vuuel te wied veur zón bieës en vuuel te kald. Waorum Caspar neet meigekómme waar heb ik neet gevraog, det duis se neet beej Keuninge.

Meschiens haet 't iets met de crisis of de bezuniging te make. Zoel Caspar óntslage zien of staon ze d'r in 't oëste baeter veur?

Enfin ze hadde d'r zelf 'n oplossing veur bedach.

De **3 Keuninge- traditie** um 'n boeën in de pudding te verstoppe woort ietskes aangepas,

de kins op unne brunch neet met pudding beginne netuurlik.

De **2 Keuninge** hadde de organisatie van de brunch gevraog um unne gas cakeskes te bakke en in ein cakeske 'n broene boeën te verstoppe.

Dae die boeën in 't cakeske vónd woord gekroeënd tot 3e keuning.

**Ben Schouren** waar de bófkónt dae veur efkes 'ne Keuning mog zien.

Balthasar en Melchior hadde um bes de helf van eure jas kinne gaeve net wie Sintermerte, maar det is 'n ander verhaol.

Die jasse ware in elk geval groeët genóg um te deile, maar asse de kemiel al kwiet bis en diene collega dan bisse zunig op dae jas.

**Keuning Ben**, of eigelik Caspar, kreeg allein maar 'ne kroeën op en mog 'n kisse met allerhande saorte boeëne met nao hoes neme.

Bes 'n nuttig kedo in de winterperiode, van boeëne kries se 't vanzelf werm.



Wie bijna idderein vruuger op schoeël in de godsdeensles gelierd haet, brachte de **Keuninge** hiele aparte kedootjes met: gold, wierouk en mirre.

Maar dao waar deze kier euver naogedach, want bin ierlik, waat mós se in 2013 met wierouk

en mirre.

Gold is taegeswoordig flink geld waerd, dao kóste de **Keuninge** royaal de brunch van betale.

Die **2 oeësterse Keuninge** ware bes 'n prakties stel.

Zeej hadde 'n doeës lucifers meigebrach en waat deig, dao kins se tenminste 'ne mik van bakke.

Det is waal zoeë hendig asse unne brunch wils gaeve veur in de 80 minse.

Ind vurrig jaor hadde de Keuninge vanoet 't oeëste met de organisatie gebeld euver de cakeskes maar ouk met Rob D. Jao..... neet te gluive, zelfs dao zien de good verzórgde brunches van Rapido bekind.

Rob had zien assistente Francie meigebrach en die 2 ware good op ein ingespeuld, dus dae brunch leep wie 'ne trein. D'r waar 'ne extra kraom gemak veur de soep, de pannekeuk en later de toetjes.

Eigelik hit det in **Keuninklikke kringe**: 't dessert, maar good de verschillende mousse-toetjes hadde 'ne culinaire smaak.

De kins beej **Keuninge** netuurlik neet met 'ne wackelpeter aankómme, det pas mier beej 'n wiekend in den Eifel.

Veur groeëte, veur kinder, veur keuninge en veur Chris en Marga, veur idderein waar d'r waat te bikkesemente.

Balthasar en Melchior hadde as verrassing ouk nog "**entertainment**" meigebrach.

**Chris en Marga** hoofde neet zoeë wied te reize daorum kwame die wat later.

Ze ginge her en der aan de aettaofels de kinder en groeëte vermake met listige geintjes en kunsjes.

Tössedor kós se raoje wiewuuel boeëne d'r in 'ne pot zoote en intösse kós idderein gewoeën dooraete.

Trouwens weit geej waorum Christus neet in België gebore is.....

riechtig.....umdet ze dao gen 3 wieze kóste vinde !!

't Waar weer 'ne gezellige brunch, laot ós die traditie maar in iere halde met of zónder **2/3 Keuninge**.

De groete oet 't



oeëste.



Elly van Elswijk

## Commentaren

Leuk stök door R. Doesborg op 28-01-2013 om 19:40

Waat ein leuk stök is Elly toch en waat ut geschreeve haet auk. Ik kin auk nog enne mop euver die dreej keuninge.

Lang, heel lang geleden reden er eens drie wijzen ,s\avonds in de kou, op een paard. In de verte zagen ze een klein stalletje, en er brandde een kampvuurtje. Ze gingen erop af en gingen naar binnen. Een van de drie is nogal lang en stoot z\ n hoofd. JEZUS CHRISTUS!! vloekt hij. Goh, zegt maria, dat was ook een leuke naam voor onze Harrie geweest.